

高常侍集卷第一

賦

東征賦

歲在甲申秋窮季月高子遊梁既久方適楚以  
超忽望君門之悠哉微先容以效拙姑不隱而  
不仕宜其漂淪而播越出東苑而遂行沿濁河  
而茲始感隋皇之敗德劃平原而爲此西馳洛  
汭東並淮涘地豁山開川流波委六宮景從千  
官邈迤龍舟錦帆照耀乎數千百里大駕將去  
羣盜日起尸祿者卷舌而偷生直諫者解頤而



後死寄腹心於梟獍任手足於蛇虺既垂弒於  
匹夫尚興疑於愛子豈不以爲窮力役於征戰  
務淫逸於奢侈六軍悲牧野之師萬姓哭遼陽  
之鬼嗟顛覆於曩日指年代於流水唯見長亭  
之煙火曠野之荆杞至鄴縣之舊邑懷蕭相之  
高風旣屈節於主吏每歸誠於沛公始俱起於  
天下乃從定於關中推金帛於他人挹圖籍於  
我躬按山川之險阻救天地之屯蒙嘉盈休以  
增邑方指蹤而建功納邵平以防患舉曹參而  
告終經洛城而永望想譙郡而銷憂慨魏武之

雄圖終大濟於橫流用兵戈以威四海挾天子  
而令諸侯乃擅命以誅伏徒矯跡以安劉吾始  
未知夫逆順胡寧比德於殷周下符離之西偏  
臨彭城之高岸連山鬱其漭蕩大澤平乎渺漫  
昔天未厭禍項氏叛渙解齊歸楚自蕭擊漢天  
地無色風塵潰亂憫君王之軾軻混士卒以奔  
散苟炎運之克昌豈生人之塗炭次靈壁之逆  
旅面垓下之遺墟嗟魯公之慷慨聞楚聲而悵  
於歌拔山以涕洟竊霸圖而莫居擯亞父之何  
甚悲虞姬之有餘出重圍以狼狽至陰陵以躑

踏顧天亡以自負雖身死兮焉如登夏丘而縱  
目對蒲隧而愁予問取慮之斯在微長直之捨  
諸宿徐縣之廻津惟偃王之舊域方以小而事  
大豈無位而有德彼皆昏暴以喪邦伊何仁義  
而亡國高延陵之掛劔慕班彪之述職緬沛水  
之悠悠俯婁林之紆直即日河滸依然泗上山  
川土田耳目清曠眺淮源之呀豁偉楚關之雄  
壯掛輕席於中流順長風以破浪過盱眙之邑  
屋傷義帝之波蕩歎三戶之亡秦知萬人以離  
項越龜山而訪泊入漁浦而待潮鴻鴈飛兮木

葉下楚歌悲兮雨蕭蕭霜封野樹水凍寒苗岸  
草無色蘆花自飄幸息肩於人事願投跡於漁  
樵思魏闕而天遠向秦川而路遙候鳴雞以進  
帆趨亂流以爭迅縱孤舟於浩大撫垂堂以誠  
慎遵枉渚於淮陰徵昔人於韓信哀王孫之寄  
食嘉漂母之無愠鄙亭長之不仁乃晨炊而嗇  
恡忽從龍以獲騁遂擒豹以自奮破全趙而用  
竒稱假齊而益振幸辭通以感惠俄結締而謀  
釁當在約而必亨曷持盈而不順凌赤岸之迢  
迤掉白波之紆餘歷山陽之村墅挹襄郢之邑

居人多嗜艾俗喜觀漁連葭葦於郊甸雜汀洲  
於里閭感百川之朝宗彌結念於歸歟日杲杲  
以麗天雲飄飄以卷舒魯放情於蹈海丘永歎  
於乘桴遇坎則止吾今不知其所如哉

鶻賦 并序

天寶初有自滑臺奉太守李公鶻賦以垂示適  
越在草澤才無能爲尚懷知音遂作鶻賦其詞  
曰  
夫何鶻之爲用置之則已縱之無匹懷果斷之  
沉潜任性情之敏疾頭小而銳氣雄而逸貌耿

介以凌霜目精明而點漆想像遼遠孤貞深密  
將必取而乃廻若授詞而勿失當白帝之用事  
入青雲而委質乃徇節以勃然因指縱而挺出  
巖冬欲雪蔓草初焚野漭蕩而風繁天崢嶸而  
日曛忿顧兔之狡伏耻高鳥之成群始滅没以  
畧地忽升騰而參雲翻决烈以電掣皆披靡而  
星分奔走者折脇而絕脰鳴噪者血灑而毛紛  
雖百中之自我終一呼之在君夫其左右更進  
縱橫發迹掃窟穴之沙競振荆榛之淅瀝翕六  
翮以直上交雙指以迅擊合連弩之應機類鳴

髀之破鋪豁爾胷臆伊何凌厲以爽朗曾莫  
介豈虞險艱而怵惕觀其所獲多有得用非媒  
歷閭闔以肅穆翊鈞陳而環迴幸輝光於蒐狩  
承剪拂於樓臺望鳳沼而輕舉紛羽族之驚猜  
路杳杳而何向雲茫茫而不開鶯出谷兮徒爾  
鶴乘軒而何哉彼懷毅勇坎軻而棄置胡不效  
其間關而徘徊爾乃顧恩有地戀主多情念層  
空而不起託虛室以無驚雅節表於能讓義心  
激於效誠勢逾高而下急體彌重而飛輕戢羽  
翼以受命若肝膽之必呈嗟日月之云邁猶羈

縻而見嬰別有橫大海而遙度順長風而一寫  
投足眇於巖巔脫身免於弋者冰落落以凝閉  
雪皚皚而飄灑諒堅銳之特然寧苦寒之求捨  
匪聚食以祈滿聊擊鮮而自假比玄豹之潛形  
同幽人之在野矧其升巢絕壁獨立危條心條  
忽於萬里思超遙於九霄豈別物之能暴曷凡  
禽之見邀則未知鴛鴦之所適孰與夫鵬鷁兮  
逍遙云爾哉

五言古詩

宋中十首

梁王昔全盛賓客復多才悠悠一千年陳跡唯  
高臺寂寞向秋草悲風千里來  
朝臨孟諸上忽見芒碭間赤帝終已矣白雲長  
不還時清更何有禾黍徧空山

景公德何廣臨變莫能欺三請皆不忍妖星終  
自移君心本如此天道豈無知

梁苑白日暮梁山秋草時君王不可見修竹令  
人悲九月桑葉盡寒風鳴樹枝

登高臨舊國懷古對窮秋落日鴻鴈度寒城砧  
杵愁昔賢不復有行矣莫淹留

出門望終古獨立悲且歌憶昔魯仲尼悽悽此  
經過衆人不可向伐樹將如何

逍遙漆園吏冥沒不知年世事浮雲外閑居大  
道邊古來同一馬今我亦忘筌

五霸遞征伐宋人無戰功解圍幸竒說易子傷  
吾衷唯見盧門外蕭條多轉蓬

常愛宓子賤鳴琴能自親邑中靜無事豈不由  
其身何意千年後寂寥無此人

闕伯去已久高丘臨道傍人皆有兄弟爾獨爲  
參商終古猶如此而人安可量

薊中作

策馬自沙漠長驅登塞垣邊城何蕭條白日黃  
雲昏一到征戰處每愁胡虜翻豈無安邊書諸  
將已承恩惆悵孫吳事歸來獨閉門

睢陽酬別暢大判官

吾友遇知己策名逢聖朝高才擅白雪逸翰櫟  
青霄承詔選嘉兵慨然即馳軺清晝下公館尺  
書忽相邀畱歡惜別離畢景駐行鑣言及沙漠  
事益令胡馬驕丈夫拔東蕃聲冠霍嫫姚兜鍪  
衝矢石鐵甲生風颭諸將出井陘連營濟石橋

酋豪盡俘馘子弟輸征徭邊庭絕刁斗戰地成  
漁樵榆關夜不扃塞口長蕭蕭降胡滿薊門一  
一能射鵬軍中多燕樂馬上何輕趨戎狄本無  
厭羈縻非一朝飢附誠足用飽飛安可招李牧  
制儋藍遺風豈寂寥君還謝幕府慎勿輕芻蕘  
荅侯少府

常日好讀書晚年學垂綸漆園多喬木睢水清  
粼粼詔書下柴門天命敢逡巡赫赫三伏時十  
日到咸秦褐衣不得見黃綬翻在身吏道頓羈  
束生涯難重陳北使經大寒關山饒苦辛邊兵

若芻狗戰骨成埃塵行矣勿復言歸歟傷我神  
如何燕趙陸忽偶平生親開館納征騎彈紉娛  
遠賓飄飄天地間一別方茲晨東道有佳作南  
朝無此人性靈出萬象風骨超常倫吾黨謝王  
粲群賢推却說明時取秀才落日過蒲津節苦  
名已富祿微家轉貧相逢愧薄遊撫已荷陶鈞  
心事正堪盡離憂寧太頻兩河歸路遙二月芳  
草新柳接滹沱暗鷺連渤海春誰謂行路難猥  
當希代珍提握每終日相思猶比隣江海有扁  
舟丘園有角巾君意定何適我懷知所遵浮沉

各異宜老大貴全真莫作雲霄計遑遑隨措紳

哭單父梁九少府

開篋淚沾臆見君前日書夜臺今寂寞猶是子  
雲居疇昔貪靈竒登臨賦山水同舟南浦下望  
月西江裏契闊多別離綢繆到生死九原即何  
處萬事皆如此晉山徒嵯峨斯人已冥冥常時  
祿且薄歿後家復貧妻子在遠道弟兄無一人  
十上多苦辛一官常自哂青雲將可致白日忽  
先盡唯有身後名空留無遠近

宋中遇陳二



常參鮑叔義所期王佐才如何守苦節獨此無  
良媒離別十年外飄飄千里來安知罷官後惟  
見柴門開窮巷隱東郭高堂詠南陔籬根長花  
草井口生莓苔伊昔望霄漢于今倦蒿萊男兒  
命未達且進手中杯

別王徹

歸客自南楚悵然思北林蕭條秋風暮迴首江  
淮深留連愁作歡或爲梁甫吟時輩想鵬舉他  
人嗟陸沉載酒登平臺贈君千里心浮雲暗長  
路落日有歸禽離別未足悲辛勤當自任吾知

十年後季子多黃金

送蕭十八

常苦古人遠今見斯人古淡泊遣聲華周旋必  
鄒魯故交在梁宋遊方出庭戶匹馬鳴朔風一  
身濟河滸辛勤採蘭詠欵曲翰林主歲月催別  
離庭闈遠風土寥寥寒煙靜莽莽夕雲苦明發  
不在茲青天眇難覩

宋中送族姪式顏時張大夫貶括州使  
人召式顏遂有此作

大夫擊東胡胡塵不敢起胡人山下哭胡馬海

邊死部曲盡公侯輿臺亦朱紫當時有勲業末  
路遭讒毀轉旆燕趙間剖符括蒼裏弟兄莫相  
見親族遠粉梓不改青雲心仍招布衣士平生  
懷感激本欲候知己去矣難重陳飄然自茲始  
遊梁且未遇適越今可以鄉山西北愁竹箭東  
南美崢嶸縉雲外蒼莽幾千里旅鴈悲啾啾朝  
昏孰云已登臨多瘴癘動息在風水雖有賢士  
人終爲客行子我携一尊酒滿酌聊勸爾勸爾  
惟一言家聲勿淪滓

又送族姪式顏

惜君才未遇愛君才若此世上五百年吾家一  
千里俱遊帝城下忽在梁園裏我今行山東離  
憂不能已

同呂判官從哥舒大夫破洪濟城廻登  
積石軍多福七級浮圖

塞口連濁河轅門對山寺寧知鞍馬上獨有登  
臨事七級凌太清千崖列蒼翠飄飄方寓目想  
像見深意高興殊未平涼風颯然至拔城陣雲  
合轉旆胡星墜大將何英靈官軍動天地君懷  
生羽翼本欲厚騏驥歛段苦不前青冥信難致

一歌陽春後三嘆終自愧

登壠

登壠遠行客壠上分流水流水無盡期行人未  
云已淺才登一命孤劒通萬里豈不思故鄉從  
來感知已

高常侍集卷第一

高常侍集卷第二

五言古詩

宴韋司戶山亭院

人幽想靈山意愜憐遠水習靜務爲適所居還  
復爾汲流漲華池開酌宴君子苔徑試窺踐石  
屏可攀倚入門見中峯携手如萬里橫琴了無  
事垂釣應有以高館何沉沉颯然涼風起

贈別王七十管記

故交吾未測薄宦空年歲晚節蹤曩賢雄詞冠  
當世堂中皆食客門外多酒債產業曾未言衣

表與人敞飄飄戎幕下出入關山際轉戰輕壯  
心立談有邊計雲沙自迴合天海空迢遞星高  
漢將驕月盛胡兵銳沙深冷陁斷雪暗遼陽關  
亦謂掃欃槍旋驚陷蜂蠆歸旌告東捷關騎傳  
西敗遙飛絕漠書已築長安第畫龍俱在葉窟  
鶴先歸衛勿辭部曲勲不籍將軍勢相逢季冬  
月悵望窮海裔折劍看賊人嚴裝遂云邁我行  
即悠紆及此還羈滯曾非濟代謀且有臨深誠  
隨波混清濁與物同醜麗眇憶青巖棲寧忘褐  
衣拜自言借水石本欲親蘭蕙何意薄松筠翻

然重管蒯恒深取與分孰慢平生契款曲雞黍  
期酸辛別離袂逢時媿名節遇坎悲渝替適趙  
非解紛遊燕獨無說浩歌方振蕩逸翮思凌勵  
倏若異鵬搏吾當學蟬蛻

效古贈崔二

十月河洲時一看有歸思風颺生慘烈雨雪暗  
天地我輩今胡爲浩哉迷所至緬懷當途者濟  
濟居聲位邈然在雲霄寧肯更淪躋周旋多燕  
樂門館列車騎美人芙蓉姿狹室蘭麝氣金爐  
陳獸炭談笑正得意豈論草澤中有此枯槁士

我慙經濟策久欲甘棄置君負縱橫才如何尚  
顛顛長歌增鬱快對酒不能醉窮達自有時夫  
子莫下淚

鉅鹿贈李少府

李侯雖薄宦時譽何籍籍駿馬常借人黃金每  
留客投壺華館靜縱酒涼風夕即此遇神仙吾  
忻知損益

酬司空璩

飄飄未得意感激與誰論昨日遇夫子乃欣吾  
道存江山滿詞賦扎翰起涼溫吾見風雅作人

知德業尊驚飈蕩萬木秋氣屯高原燕趙何蒼  
茫鴻雁來翩翩此時與君別握手欲無言

酬李少府

出塞魂猶驚懷質意難說誰知吾道間乃在客  
中別日夕捧瓊瑤相思無休歇伊人雖薄宦舉  
代推高節述作凌江山聲華滿冰雪一登薊丘  
上四顧何慘烈來鴈無盡時邊風正騷屑將從  
崖谷遁且與沉浮絕君若登青雲吾當投魏闕

酬裴秀才

男兒貴得意何必相知早飄蕩與物永蹉跎覺

年老長卿無產業季子慙妻嫂此事難重陳未  
於衆人道

酬陸少府

朝臨淇水岸還望衛人邑別意在山阿征途背  
原隰稍稍前村口唯見轉蓬入水渚人去遲霜  
天鴈飛急回應不遠別所與路未及欲濟川上  
舟相思空佇立

寄孟五

秋風落窮巷離憂兼暮蟬後時已如此高興亦  
徒然知君念淹泊憶我屢周旋征路見來鴈歸

人悲遠天平生感千里

貞賢

同觀陳十六史興碑

并序

楚人陳章甫繼毛詩而作史興碑遠自周末迨  
乎隋季善惡不隱蓋國風之流未藏名山刊在  
樂石僕美其事而賦是詩焉

荆衡氣偏秀江漢流不歇此地多精靈有時生  
才傑伊人今獨步逸思能間發永懷掩風騷千  
載常屹屹新碑亦崔嵬佳句懸日月則是刊石  
經終然繼檮杌我來觀雅製慷慨變毛髮季主  
盡荒淫前王徒貽厥東周旣削弱兩漢更淪沒

西晉何披猖五胡相唐突作歌乃彰善比物仍  
惡訐感歎將謂誰對之空咄咄

宋中遇劉書記有別

何代無秀士高門生此才森然覩毛髮若見江  
山來幾載困常調一朝時運催白身謁明主待  
詔登雲臺相逢梁宋間與我醉蒿萊寒楚渺千  
里雪天晝不開末路終別離不能強悲哀男兒  
爭富貴勸爾莫遲迴

連上題樊氏水亭

連上非所趣偶爲世務牽經時駐歸棹日夕對

平川莫論行子愁且得主人賢亭上酒初熟厨  
中魚每鮮自說宦游來因之居住偏煮鹽滄海  
曲種稻長淮邊四時長晏如百口無飢年菱華  
藩籬下漁樵耳目前異縣少朋從我行復連遭  
向不逢此君孤舟已言旋明日又分首風濤還  
眇然

連上別王秀才

飄颻經遠道客思滿窮秋浩蕩對長漣君行殊  
未休崎嶇山海側想像無前儔何意照乘珠忽  
然欲暗投東路方蕭條楚歌復悲愁暮帆使人

感去鳥兼離憂行矣當自愛壯年莫悠悠余亦  
從此辭異鄉難久畱贈言豈終極慎勿滯滄洲  
觀李九少府翫樹宓子賤神祠碑

吾友吏茲邑亦嘗懷宓公安知夢寐間忽與精  
靈通一見興永嘆再來激深衷賓從何逶迤二  
十四老翁於焉建層碑突兀長林東作者無愧  
色行人感遺風坐令高岸盡獨對秋山空片石  
勿謂輕斯言固難窮龍盤色絲外鵲顧偃波中  
形勝駐群目堅貞指蒼穹我非王仲宣去矣徒  
發蒙

東平路中遇大水

天災自古昔昏墊彌今秋霖霖溢川原頽洞涵  
田疇指塗適汶陽掛席經蘆洲永望齊魯郊白  
雲何悠悠傍沿鉅野澤大水縱橫流虫蛇擁獨  
樹麋鹿奔行舟稼穡隨波瀾西成不可求室居  
相枕籍鼃鼃聲啾啾乃憐穴蟻漂益羨雲禽游  
農夫無倚着野老生殷憂聖主當深仁廟堂運  
良籌倉廩終爾給田租應罷收我心胡鬱陶征  
旅亦悲愁縱懷濟時策誰肯論吾謀

東平畱贈狄司馬



古人無宿諾茲道未爲難萬里赴知己一言誠  
可歎馬蹄經月窟劍術指樓蘭地出北庭盡城  
臨西海寒森然瞻武庫則是弄儒翰入幕縮銀  
綬乘輅兼鐵冠練兵日精銳殺敵無遺殘獻捷  
見天子論功俘可汗激昂丹墀下顧盼青雲端  
誰謂縱橫策翻爲權勢干將軍旣坎壈使者亦  
辛酸耿介挹三事羈離從一官知君不得意他  
日會鵬搏

遇冲和先生

冲和生何代或謂遊東溟三命謁金殿一言拜

銀青自云多方術往往通神靈萬乘親問道六  
宮無敢聽昔云限霄漢今來覩儀形頭戴鶡鳥  
冠手搖白鶴翎終日飲醇酒不醉復不醒猶憶  
雞鳴山每誦西昇經拊背念離別依然出戶庭  
莫見今如此曾爲一客星

自淇涉黃河途中十二首

川上常極目世情今已閒去帆帶落日征路隨  
長山親友若雲霄可望不可攀於茲任所愜浩  
蕩風波間

清晨泛中流羽族滿汀渚黃鵠何處來昂藏寡

儔侶飛鳴無人見飲啄豈得所雲漢爾固知胡  
爲不輕舉

野人頭盡白與我忽相訪手持青竹竿日暮淇  
水上雖老美容色雖貧亦閑放釣魚三十年中  
心無所向

南登滑臺上却望河淇間行樹夾流水孤城對  
遠山念茲川路闊羨爾沙鷗閑長想別離處猶  
無音信還

東入黃河水茫茫汎紆直北望太行山峨峨半  
天色山河相映帶深淺未可測自昔有賢才相

逢不相識

秋日登滑臺臺高秋已暮獨行旣未愜懷土悵  
無趣晉宋何蕭條羗胡散馳騫當時無戰畧此  
地即邊戍兵革徒自勤山河孰云固乘閒喜臨  
眺感物傷遊寓惆悵落日前飄颻遠帆處北風  
吹萬里南鴈不知數歸意方浩然雲沙更迴互  
亂流自茲遠倚檝時一望遙見楚漢城崔嵬高  
山上天道昔未測人心無所向屠釣稱侯王龍  
蛇爭霸王緬懷多殺戮顧此增慘愴聖代休甲  
兵吾其得閑放

茲川方悠邈雲沙無前後古堰對河壩長林出  
淇口獨行非吾意東向日已久憂來誰得知且  
酌罇中酒

朝從北岸來泊船南河滸試共野人言深覺農  
夫苦去秋雖薄熟今夏猶未雨耕耘日勤勞租  
稅兼舄鹵園蔬空寥落產業不足數尚有獻芹  
心無因見明主

茫茫濁河注懷古臨河濱禹功本豁達漢跡方  
因循坎德昔滂沲馮夷胡不仁渤溘陵隄防東  
郡多悲辛天子忽驚悼從官皆負薪畚築豈無  
謀祈禱如有神宣房今安在高岸空嶙峋

我行倦風湍輟棹將問津空傳歌瓠子感慨獨  
愁人孟夏桑葉肥穠陰夾長津蠶農有時節田  
野無閑人臨水狎漁樵望山懷隱淪誰能去京  
洛顛顛對風塵

朝景入平川川長復垂柳遙看魏公墓突兀前  
山後憶昔大業時群雄角奔走伊人何電邁獨  
立風塵首傳檄舉教倉擁兵屯洛口連營一百  
萬六合如可有方項終比肩亂隋將假手力爭  
固難恃驕戰曷能久若使學蕭曹功名當不朽

奉和儲光義

天靜終南高俯映江水明有若蓬萊下淺深見  
澄瀛群峯懸中流石壁如瑤瓊魚龍隱蒼翠鳥  
獸游清冷菰蒲林下秋薜荔波中輕山萸浴蘭  
泚水若居雲屏嵐氣浮潛宮孤光隨曜靈陰陰  
豫章館宛宛百花亭大君及群臣燕樂方嚶鳴  
吾黨二三子茲辰怡性情逍遙滄洲時乃在長  
安城

塞下曲

結束浮雲駿翩翩出從戎且憑王子怒復倚將

軍雄萬鼓雷殷地千旗火生風日輪駐霜戈月  
魄絲琯弓青海陣雲匝黑山兵氣衝戰酣太白  
高戰罷旄頭空萬里不惜死一朝得成功畫圖  
麒麟閣入朝明光宮大咲向文士一經何足窮  
古人昧此道往往成老翁

高常侍集卷第二

高常侍集卷第三

五言古詩

三君詠 并序

開元中適游於魏郡北有故太師鄭公舊館里  
中有故尚書郭公遺業邑外又有故太守狄公  
生祠焉觀物增懷遂爲三君詠

魏鄭公

鄭公經綸日隋氏風塵昏濟代取高位逢時敢  
直言道光先帝業義激舊君恩寂寞卧龍處英  
靈千載魂

郭代公

代公實英邁津涯浩難識擁兵抗矯徵仗節歸  
有德縱橫負才智顧眄安社稷流落勿重陳懷  
哉爲悽惻

狄梁公

梁公乃貞固勲烈垂竹帛昌言太后朝潛運儲  
君策待賢開相府共理登方伯至今青雲人猶  
是門下客

東平路作三首

南圖適不就東走豈吾心索索涼風動行行秋

水深蟬鳴木葉落茲夕更秋霖

明時好畫策動欲干王公今日無成事依依親  
老農扁舟向何處吾愛汶陽中

清曠涼夜月徘徊孤客舟渺然風波上獨夢前  
山秋秋至復搖落空令行者愁

銅雀妓

日暮銅雀迴秋深玉座清蕭森松柏望委鬱綺  
羅情君恩不再得妾舞爲誰輕

同諸公登慈恩寺浮圖

香界泯群有浮圖豈諸相登臨駭孤高披拂忻

大壯言是羽翼生迥出虛空上頓疑身世別乃  
覺形神王宮闕皆戶前山河盡簷向秋風昨夜  
至秦塞多清曠千里何蒼蒼五陵鬱相望盛時  
慙阮步末宦知周防輸效獨無因斯焉可遊放

和賀蘭判官望北海作

聖代務平典輶軒推上才迢遙溟海際曠望滄  
波開四牡未遑息三山安在哉巨鼇不可釣高  
浪何崔嵬湛湛朝百谷茫茫連九垓挹流納廣  
大觀異增遲迴日出見魚日月圓知蚌胎跡非  
想像到心以精靈猜遠色帶孤嶼虛聲涵殷雷

風行越裳貢水過天吳災攬轡隼將擊忘機鷗  
復來緣情韻騷雅獨立遺塵埃吏道竟殊用翰  
林仍忝陪長鳴謝知己所媿非龍媒

奉酬北海李太守丈人夏日平陰亭

天子股肱守丈人山岳靈出身侍丹墀舉翮凌  
青冥當昔皇運否人神俱未寧諫官莫敢議酷  
吏方專刑谷永獨言事匡衡多引經兩朝納深  
衷萬乘無不聽盛烈播南史雄詞豁東溟誰謂  
整隼旗翻然憶柴扃寄書汶陽客迴首平陰亭  
開封見千里結念存百齡隱軫江山麗氛氲蘭

一高僧傳集卷三  
三  
匪馨自憐遇時休漂泊隨流萍春野變木德夏  
天臨火星一生徒羨魚四十猶聚螢從此日閑  
放焉能懷拾青

塞上

東出盧龍塞浩然客思孤亭埃列萬里漢兵猶  
備胡邊塵滿北溟虜騎正南驅轉鬪豈長策和  
親非遠圖惟昔李將軍按節臨此都揔戎掃大  
漠一戰擒單于常懷感激心願效縱橫謨倚劍  
欲誰語關河空鬱紆

贈別沈四逸人

沈侯未可測其况信浮沉十載常獨坐幾人知  
此心乘舟蹈滄海買劍投黃金世務不足煩有  
田西山岑我來遇知己遂得開清襟何意閩閩  
間沛然江海深疾風掃秋樹渫上多鳴砧耿耿  
尊酒前聯鴈飛愁音平生重離別感激對孤琴  
遇盧明府有贈

良吏不易得古人今可傳靜然本諸已以此知  
其賢我行挹高風羨爾兼少年胸懷豁清夜史  
漢如流泉明日復行春逶迤出郊壇登高見百  
里桑野鬱芊芊時平俯鵲巢歲熟多人煙奸猾



唯閉戶逃亡歸種田廻軒自郭南老幼滿馬前  
皆賀蠶農至而無徭役牽君觀黎庶心撫之誠  
萬全何幸逢大道願言烹小鮮誰能奏明主一  
試武城絃

題尉遲將軍新廟

周室旣版蕩賊臣立嬰兒將軍獨激昂誓欲酬  
恩私孤城日無援高節終可悲家國共淪亡精  
魂空在斯沉沉積冤氣寂寂無人知良牧懷深  
仁與君建明祠父子俱血食軒車每逶迤我來  
薦蘋蘩感歎興此詞晨光上階闥殺氣翻旌旗

明明幽冥理至誠信莫欺唯夫二千石多慶方  
自茲

單父逢鄧司倉覆倉庫因而有贈

邦牧今坐嘯群賢趨紀綱四人忽不擾耕者遙  
相望粲粲府中妙授詞如履霜炎炎伏熱時草  
木無晶光匹馬度睢水清風何激揚校緡閱帑  
藏發廩忻斯箱邂逅得相逢歡言至夕陽開襟  
自公餘載酒登琴堂舉杯挹山川寓目窮毫芒  
白鳥向田盡青蟬歸路長醉中不惜別况乃正  
遊梁

同韓四薛三東亭翫月

遠遊悵不樂茲賞吾道存款曲故人意辛勤清  
夜言東庭何寥寥佳境無朝昏堦墀近洲渚戶  
牖當郊原矧乃窮周旋游時怡討論樹陰蕩瑤  
瑟月氣延清樽明河帶飛鴈野火連荒村對此  
更愁予悠哉懷故園

同敬八盧五汎河間清河

清川在城下沿汎多所宜同濟愜數公翫物欣  
良時飄飄波上興燕婉舟中詞昔涉乃平原今  
來忽漣漪東流達滄海西流延滹池雲樹共晦

明井邑相逶迤稍隨歸月帆若與沙鷗期漁父  
更留我前潭水未滋

同房侍御山園新亭與邢判官同遊

隱隱春城外蒙籠陳跡深君子顧榛莽與言傷  
古今決河導新流䟽逕蹤舊林開亭俯川陸時  
景宜招尋肅穆逢使軒夤緣事登臨忝游芝蘭  
室還對桃李陰岸遠白波來氣喧黃鳥吟因覩  
歌頌作始知經濟心灌壇有遺風單父多鳴琴  
誰爲父州縣蒼生懷德音

同馬太守聽九思法師講金剛經

吾師晉陽寶傑出山河最途經世諦聞心到空  
王外鳴鍾山虎伏說法天龍會了義同建瓴梵  
法若吹籟深知億劫苦善喻恒沙大捨施割肌  
膚攀緣去親愛招提何清淨良牧駐軒蓋露冕  
衆香中臨人覺苑內心持佛印义標割魔軍退  
願開初地因永奉彌天對

送韓九

惆悵別離日徘徊岐路前歸人望獨樹匹馬隨  
秋蟬常與天下士許君兄弟賢良時正可用行  
矣莫徒然

登子賤琴堂賦詩三首并序

甲申歲適登子賤琴堂賦詩三首首章懷宓公  
之德千祀不朽次章美太守李公能嗣子賤之  
政再造琴臺末章多邑宰崔公能思子賤之理  
宓子昔爲政鳴琴登此臺琴和人亦閑千載稱  
其才臨眺忽悽愴人琴安在哉悠悠此天壤唯  
有頌聲來

邦伯感遺事慨然建琴堂乃知靜者心千載猶  
相望入室想其人出門何茫茫唯見白雲合東  
臨鄒魯鄉

高宗集卷三  
世  
皤皤邑中老自誇邑中理何必昇君堂然後知  
君美開門無犬吠早卧常晏起昔人不忍欺今  
我還復爾

同薛司直秋霽曲江俯見南山作

南山鬱初霽曲江湛不流若臨瑤池間想望崑  
崙丘迴首見黛色眇然波上秋深沉俯崢嶸清  
淺延阻修連潭萬木影插岸千巖幽杳藹信難  
測淵淪無暗投片雲對漁父獨鳥隨虛舟我心  
寄青霞世事慙白鷗得意在乘興忘懷非外求  
良辰自多暇忻與數子遊

魯西至東平

沙岸泊不定石橋水橫流問津見魯谷懷古傷  
家丘寥落千載後空傳褒聖侯

淇上別劉少府子英

近來住淇上蕭條惟空林又非耕種時閑散多  
自任伊君獨知我驅馬欲招尋千里忽携手十  
年同苦心求仁見交態於道喜甘臨逸思乃天  
縱微才應陸沉飄然歸故鄉不復問離襟南登  
黎陽渡莽蒼寒雲陰桑葉原上起河凌山下深  
途窮更遠別相對益悲吟

別耿都尉

四十能學劍時人無此心如何耿夫子感激投  
知音翩翩白馬來二月青草深別易小千里興  
酣傾百金

宋中遇林慮楊十七山人因而有別

昔余涉漳水驅車行鄴西遙見林慮山蒼蒼憂  
天倪邂逅逢爾曹說君彼巖樓蘿徑垂野蔓石  
房倚雲梯秋韭何青青藥苗數百畦栗林隘谷  
口枯樹森迴溪耕耘有山田紡績有山妻人生  
苟如此何必組與珪誰謂遠相訪曩情殊不迷

簷前舉醇醪竈下烹隻雞朔風忽振蕩昨夜寒  
蟬啼遊子益思歸罷琴傷解攜出門盡原野白  
日黯已低始驚道路難終念言笑睽因聲謝岑  
壑歲暮一攀躋

苦雨寄房四昆季

獨坐見多雨况茲兼索居茫茫十月郊窮陰千  
里餘彌望無端倪北風擊林簌白日眇難覩黃  
雲爭卷舒安得造化功曠然一掃除滴瀝簷宇  
愁寥寥談咲踈泥塗擁城郭水潦盤丘墟惆悵  
憫田農徘徊傷里閭曾是力井稅曷爲無斗儲

萬事切中懷十年思上書君門嗟緬邈身計念  
居諸沉吟顧草茅鬱快任盈虛黃鵠不可羨鳴  
雞時起予故人平臺側高館臨通渠兄弟方荀  
陳才華冠應徐彈碁自多暇飲酒更何如知人  
想林宗直道慙史魚携手流風在開襟鄙吝祛  
寧能訪窮巷相與對園蔬

別張少府

歸客留不住朝雲縱復橫馬頭向春草斗柄臨  
高城嗟我久離別羨君看弟兄歸心更難道回  
首一傷情

酬馬八效古見贈

深崖生綠竹秀色徒氛氲時代種桃李無人顧  
此君柰何冰雪操尚與蒿萊群願託靈仙子一  
吹聲入雲

送崔錄事赴宣城

大國非不理小官皆用才欲行宣城印住飲洛  
陽杯晚景爲人別長天無鳥迴舉帆風波渺倚  
棹江山來羨爾兼乘興蕪湖千里開

宋中別李八

歲晏誰不歸君歸意可說將趨倚門望還念同

高常侍集卷三  
人別駐馬臨長亭飄然事明發蒼茫眺千里正  
值苦寒節舊國多轉蓬平臺下明月世情薄疵  
賤夫子懷賢哲行矣各勉旃吾當挹餘烈

高常侍集卷第三

高常侍集卷第四

五言古詩

宋中別周梁李三子

曾是不得意適來兼別離如何一樽酒翻作滿  
堂悲周子負高價梁生多逸詞周旋梁宋間感  
激建安時白雪正如此青雲無自疑李侯懷英  
雄骭體乃天資方寸且無間衣冠當在斯俱爲  
千里遊勿念兩鄉辭且見壯心在莫嗟攜手遲  
涼風吹北原落日滿西陂露下草初白天長雲  
屢滋我心不可得君兮定何之京洛多知己誰

能憶左思

酬別薛三蔡大留簡韓十四主簿

迢遞辭京華辛勤異鄉縣登高俯滄海迴首淚  
如霰同人久離別失路還相見薛侯懷直道德  
業應時選蔡子負清才當年擢賓薦韓公有奇  
節詞賦凌群彥讀書嵩岑間作吏滄海甸伊余  
寡棲託感激多愠見縱誕非爾情漂淪任疵賤  
忽枉瓊瑤作乃深平生眷始謂吾道存終嗟客  
遊倦歸心無晝夜別事除言宴復值涼風時蒼  
茫夏雲變

薊門不遇王之渙郭密之因以留贈

適遠登薊丘茲晨獨搔屑賢交不可見吾願終  
難說迢遞千里遊羈離十年別才華仰清興功  
業嗟芳節曠蕩阻雲海蕭條帶風雪逢時事多  
謬失路心彌折行矣勿重陳懷君但愁絕

送虞城劉明府謁魏郡苗太守

天官蒼生望出入承明廬肅肅領舊藩皇皇降  
璽書茂宰多感激良將復吹噓未懷一言合誰  
謂千里踈對酒忽命駕茲情何起予炎天晝如  
火極目無行車長路出雷澤浮雲歸孟諸魏郡



十萬家歌鍾喧里閭傳道賢君至閉關常晏如  
君將挹高論定是問樵漁今日逢明聖吾爲陶  
隱居

酬秘書弟兼寄幕下諸公 并序

乙亥歲適徵詣長安時侍御楊公任通事舍人  
詩書起予蓋終日矣今年適自封丘尉統吏卒  
於青夷途經博陵得太守賈公之政相見如舊  
他日之意存焉司業張侯周旋迨茲僅三十載  
將疇昔是好匪窮達之異乎族弟秘書鴈序之  
白眉者風塵一別俱東西南北之人愴然相逢

適與願契旅館之暇長懷益增因賦是詩愧非  
六義之流也

亞相膺時傑群才遇良工翩翩幕下來拜賜甘  
泉宮信知命世竒適會非常功侍御執邦憲清  
詞煥春叢末路望繡衣他時常發蒙孰云三軍  
壯懼我彈射雄誰謂萬里遙在我罇俎中光祿  
經濟器精微自深衷前席屢榮問長城兼在躬  
高蹤激頽波逸翮馳蒼穹將副節制籌欲令沙  
漠空司業至應徐雅度思冲融相思三十年憶  
昨猶兒童今來抱青紫忽若披鶴鴻說劍增慷

慨論交持始終祕書即吾門虛白無不通多才  
陸平原碩學鄭司農獻封到關西獨步歸山東  
永意义知處嘉言能亢宗客從梁宋來行役隨  
轉蓬酬贈欣元弟憶賢瞻數公遊鱗戲滄浪鳴  
鳳棲梧桐並負垂天翼俱乘破浪風耽耽天府  
間偃仰誰敢同何意構廣厦翻然顧雕蟲應知  
阮步兵惆愴此途窮

淇上酬薛三椽兼寄郭少府

自從別京華我心乃蕭索十年守章句萬事空  
寥落北上登薊門茫茫見沙漠倚劍對風塵慨

然思衛霍拂衣去燕趙驅馬悵不樂天長滄洲  
路日暮邨鄆郭酒肆或淹留漁潭屢棲泊獨行  
備艱險所見窮善惡永願拯芻蕘孰云干鼎鑊  
皇情念淳古時俗何浮薄理道資任賢安人在  
求瘼故交負靈奇逸氣抱蹇諤隱軫經濟具縱  
橫建安作才望忽先鳴風期無宿諾飄飄勞州  
縣迢遞限言諛東馳眇貝丘西顧彌號畧淇水  
徒自流浮雲不堪託吾謀適可用天路豈廖廓  
不然買山田一身與耕鑿且欲同鷦鷯焉能志  
鴻鶴

酬岑二十主簿秋夜見贈之作

舍下蛩亂鳴居然自蕭索  
緬懷高秋興忽枉清夜作  
感物我心勞涼風驚二毛  
池空菡萏死月出梧桐高  
如何異鄉縣復得交才  
彥汨沒嗟後時蹉跎耻  
相見箕山別來久魏闕  
誰不戀獨有江海心  
悠然未嘗倦

苦雪四首

二月猶北風天陰雪冥冥  
寥落一室中悵然慙百齡  
苦愁正如此門柳復青青  
惠連發清興袁安念高臥  
余故非斯人爲性兼

懶惰賴茲罇中酒終日聊自過

濛濛灑平陸淅瀝至幽居  
且喜潤群物焉能悲斗儲  
故交久不見烏雀投吾廬

孰云久閒曠本自保知寡  
窮巷獨無成春條祗盈把  
安能羨鵬舉且欲歌牛下  
乃知古時人亦有如我者

登廣陵棲靈寺塔

淮南富登臨茲塔信竒最  
直上造雲族憑虛納天籟  
迥然碧海西獨立飛鳥外  
始知高興盡適與賞心會  
連山黯吳門喬木吞楚塞  
城池滿牕

下物象歸掌內遠思駐江帆暮情結春靄軒車  
疑蠢動造化資大塊何必了無身然後知所退  
魯郡途中遇徐十八錄事

誰謂嵩穎客遂經鄒魯鄉前臨少昊墟始覺東  
蒙長獨行豈吾心懷古激中腸聖人久已矣游  
夏遙相望徘徊野澤間左右多悲傷日出見關  
里川平如汶陽弱冠負高節十年思自強終年  
不得意去去任行藏

酬鴻臚裴主簿雨後睢陽北樓見贈之  
作

暮霞照新晴歸雲猶相逐有懷晨昏暇想見登  
眺目問禮侍彤襜題詩訪茅屋高樓多古今陳  
事滿陵谷地又微子封臺餘孝王築徘徊顧霄  
漢豁達俯川陸遠水對秋城長天向喬木公門  
何清淨列戟森已肅不歎攜手稀恒思看鞭速  
終當拂羽翰輕舉隨鴻鵠

薊門五首

薊門逢古老獨立思氛氲一身既零丁頭髮白  
紛紛勲庸今已矣不識霍將軍

漢家能用武開拓窮異域戍卒馱糟糠降胡飽

衣食關亭試一望吾欲涕沾臆

邊城十一月雨雪亂霏霏元戎號令嚴人馬亦  
輕肥羗胡無盡日征戰幾時歸

幽州多騎射結髮重橫行一朝事將軍出入有  
聲名紛紛獵秋草相向角弓鳴

黯黯長城外日沒更煙塵胡騎雖憑陵漢兵不  
顧身古樹滿空塞黃雲愁殺人

同群公宿開善寺贈陳十六所居

駕車出人境避暑投僧家徘徊龍象側始見香  
林花讀書不及經飲酒不勝茶知君悟此道所

未披袈裟談空忘外物持戒破諸邪則是無心  
地相看唯月華

同群公秋登琴臺

古跡使人感琴臺空寂寥靜然顧遺塵千載如  
昨朝臨眺自茲始群賢久相邀德與形神高孰  
知天地遙四時何倏忽六月鳴秋蜩萬象歸白  
帝平川橫赤霄猶是對夏伏幾時有涼颺燕雀  
滿簷楹鴻鵠搏扶搖物性各自得我心在漁樵  
兀然還復醉尚握樽中瓢

同群公出獵海上

畋獵自古昔况伊心賞俱偶與群公遊曠然出  
平蕪層陰漲溟海殺氣窮幽都鷹隼何翩翩馳  
聚相傳呼豺狼窟榛莽麋鹿罹艱虞高鳥下駢  
弓困獸鬪匹夫塵驚大澤晦火燎深林枯失之  
有餘恨獲者無全軀咄彼工拙間恨非指蹤徒  
猶懷老氏訓感歎此歡娛

同群公題鄭少府田家

鄭侯應恓惶五十頭盡白昔爲南昌尉今作東  
郡客與語多遠情論心知所益秋林旣清曠窮  
巷空浙瀝蝶舞園更閑鷄鳴日云夕男兒未稱

意其道固無適勸君且杜門勿嘆人事隔

同群公題中山寺

平原十里外稍稍雲巖深遂及清淨所都無人  
世心名僧旣禮謁高閣復登臨石壁倚松徑山  
田多栗林超遙盡巘嶸逼側仍嶮嶽吾欲休世  
事於焉聊自任

李雲南征蠻詩 并序

天寶十一載有詔伐西南夷右相楊公兼節制  
之寄乃奏前雲南太守李宓涉海自交趾擊之  
道路險艱往復數萬里蓋百王所未通也十二

載四月至於長安君子是以知廟堂使能而李  
公効節適忝斯人之舊因賦是詩

聖人赫斯怒詔伐西南戎肅穆廟堂上深沉節  
制雄遂令感激士得建非常功料死不料敵顧  
恩寧顧終鼓行天海外轉戰蠻夷中梯巘近高  
鳥穿林經毒蟲鬼門無歸客北戶多南風蜂蠆  
隔萬里雲雷隨九攻長驅大浪破急擊群山空  
餉道忽已遠縣軍垂欲窮精誠動白日憤薄連  
蒼穹野食掘田鼠哺殮兼燹僮收兵列亭堠拓  
地彌西東臨事恥苟免履危能飭躬將星獨照

耀邊色何溟濛瀟水夜可涉交州今始通歸來  
長安道召見甘泉宮廉藺若未死孫吳知暗同  
相逢論意氣慷慨謝深衷

登百丈峯二首

朝登百丈峯遙望燕支道漢壘青冥間胡天白  
如掃憶昔霍將軍連年此征討匈奴終不滅寒  
山徒草草唯見鴻鴈飛令人傷懷抱

晉武輕後事惠皇終已昏豺狼塞瀍洛胡羯爭  
乾坤四海如鼎沸五原徒自尊而今白庭路猶  
對青陽門朝市不足問君臣隨草根

酬裴員外以詩代書

凡三百四十六字

少時方浩蕩遇物猶塵埃脫畧身外事交遊天  
下才單車入燕趙獨立心悠哉寧知戎馬間忽  
展平生懷且欣清論高豈顧夕陽頽題詩碣石  
館縱酒燕王臺北望沙漠垂漫天雪皚皚臨邊  
無策畧覽古空徘徊樂毅吾所憐拔齊翻見猜  
荆卿吾所悲適秦不復廻然諾多死地公忠成  
禍胎與君從此辭每恐流年催如何俱老大始  
復忘形骸兄弟真二陸聲華連八裴乙未將星  
變賊臣候天災胡騎犯龍山乘輿經馬嵬千官

無倚着萬姓徒悲哀誅呂鬼神動安劉天地開  
奔波走風塵倏忽值雲雷擁旄出淮甸入幕徵  
楚材誓當翦鯨鯢永以竭駑駘小人胡不仁讒  
我成死灰賴得日月明照耀無不該留司洛陽  
官詹府唯蒿萊是時掃氛祲尚未殲渠魁背河  
列長圍師老將亦乖歸軍劇風火散卒爭椎埋  
一夕灑洛空生靈悲曝鯢衣冠投草莽予欲馳  
江淮登頓宛葉下栖遑襄鄧隈城池何蕭條邑  
屋更崩摧縱橫荆棘叢但見瓦礫堆行人無血  
色戰骨多青苔遂除彭門守因得朝玉階激昂



仰駕鷺獻替欣鹽梅驅傳及遠蕃憂思鬱難排  
罷人紛爭訟賦稅如山崖所思在畿甸曾是魯  
宓儕自從拜郎官列宿煥天街那能訪遐僻還  
復寄瓊瓌金玉本高價填箎終易諧朗詠臨清  
秋涼風下庭槐何意寇盜間獨稱名義偕辛酸  
陳侯誅嘆息季鷹杯白日屢分手青春不再來  
卧看中散論愁憶太常齋酬贈徒爲爾長歌還  
自吟

酬龐十兵曹

憶昔遊京華自言生羽翼懷書訪知己末路空

相識許國不成名還家有慙色託身從畎畝浪  
跡初自得雨澤感天時耕耘忘帝力同人洛陽  
至問我睢水北遂爾欵津涯淨然見胸臆高談  
懸物象逸韻投翰墨別岸迥無垠海鶴鳴不息  
梁城多古意攜手共悽惻懷賢想鄒枚登高思  
荆棘世情惡疵賤之子憐孤直酬贈感并深離  
憂豈終極

和崔二少府登楚丘城作

故人亦不遇異縣久棲託辛勤失路意感嘆登  
樓作清晨眺原野獨立窮寥廓雲散芒碭山水

還睢陽郭遶梁即襟帶封衛多漂泊事古悲城  
池年豐愛墟落相逢俱未展攜手空蕭索何意  
千里心仍求百金諾公侯皆我輩動用在謀畧  
聖心思賢才竭來刈葵藿

同呂貞外酬田著作幕門軍西宿盤山

秋夜作

磧路天 秋邊城夜應永遙傳戎旅作已報關  
山冷上將頓盤坂諸軍徧泉井綢繆閩外書慷  
慨幕中請能使勲業高動令氛霧屏遠途能自  
致短步終難騁羽翮時一看窮愁始三省人生

感然諾何啻若形影白髮知苦心陽春見佳境  
星河連塞絡刁斗兼山靜憶君霜露時使我空  
引領

哭裴少府

世人誰不死嗟君非生慮扶病適到官田園在  
何處公才群吏感棄事他人助余亦未識君  
悲哭君去

高常侍集卷第四

高常侍集卷第五

七言古詩

燕歌行 并序

開元三十六年客有從元戎出塞而還者作燕歌行以示適感征戍之事因而和焉

漢家煙塵在東北漢將辭家破殘賊男兒本自重橫行天子非常賜顏色縱金伐鼓下榆關旌旆逶迤碣石間校尉羽書飛瀚海單于獵火照狼山山川蕭條極邊土胡騎憑陵雜風雨戰士軍前半死生美人帳下猶歌舞大漠窮秋塞草

唐詩集卷五  
三  
非孤城落日鬪兵稀身當恩遇常輕敵力盡關  
山未解圍鐵衣遠戍辛勤久玉筋應啼別離後  
少婦城南欲斷腸征人薊北空回首邊庭飄緇  
那可度絕域蒼茫無所有殺氣三時作陣雲寒  
聲一夜傳刁斗相看白刃血紛紛死節從來豈  
顧勲君不見沙場征戰苦至今猶憶李將軍

行路難二首

長安少年不少錢能騎駿馬鳴金鞭五侯相逢  
大道邊美人絃管爭留連黃金如斗不敢惜片  
言如山莫棄捐安知顛顛讀書者暮宿靈臺私

自憐

君不見富家翁舊時貧賤誰比數一朝金多結  
豪貴百事勝人徒如虎子孫成行滿眼前妻能  
管絃妾歌舞自矜一身忽如此却笑傍人獨愁  
苦東隣少年安所如席門窮巷出無車有才不  
肯學干謁何用年年空讀書

別韋參軍

二十解書劍西遊長安城舉頭望君門屈指取  
公卿國風冲融邁三五朝廷歡樂彌寰宇白璧  
皆言賜近臣布衣不得干明主歸來洛陽無負

郭東過梁宋非吾土兔苑爲農歲不登鴈池垂  
釣心長苦世人向我同衆人唯君於我最相親  
且喜百年有交態未嘗一日辭家貧彈棊擊筑  
白日晚縱酒高歌楊柳春歡娛未盡分散去使  
我惆悵驚心神丈夫不作兒女別臨岐涕淚沾  
衣巾

### 送蔡山人

東山布衣明古今自言獨未逢知音識者閱見  
一生事到處豁然千里心看書學劍長辛苦近  
日方思謁明主斗酒相留醉復醒悲歌數年淚  
如雨丈夫遭遇不可知買臣主父皆如斯我全  
蹭蹬無所似看爾崩騰何若爲

### 漁父歌

曲岸深潭一山叟駐眼看釣不移手世人欲得  
知姓名良久問他不開口箬皮笠子荷葉衣心  
無所營守釣磯料得孤舟無定止日暮持竿何  
處歸

### 秋胡行

妾本邯鄲未嫁時容華倚翠人未知一朝結髮  
從君子將妾迢迢東路陞時逢大道無艱阻君

方遊宦從陳汝蕙樓獨卧頻度春彩落辭君幾  
徂暑三月垂楊蠶未眠携籠結侶南陌邊道逢  
行子不相識贈妾黃金買少年妾家夫婿在雖  
义寸心誓與長相守願言行路莫多情道妾貞  
心在人口日暮蠶飢相命歸携籠端飾來庭闈  
勞心苦力終無恨所冀君恩那可依聞說行人  
已歸止乃是向來贈金子相看顏色不復言相  
顧懷慙有何已從來自隱無疑背直爲君情也  
相會如何咫尺仍有情況復迢迢千里外誓將  
顧恩不顧身念君此日赴河津莫道向來不得

意故欲留規誡後人

留別鄭三韋九兼洛下諸公

憶昨相逢論义要顧君哂我輕常調羈旅雖同  
白社遊詩書已作青雲料蹇躓蹉跎竟不成年  
過四十尚躬耕長歌達者杯中物大笑前人身  
後名幸逢明盛多招隱高山大澤徵求盡此時  
亦得辭漁樵青袍裹身荷聖朝犁牛釣竿不復  
見縣人邑吏來相邀遠路鳴蟬秋興發華堂美  
酒離憂銷不知何時更攜手應念茲晨去折腰

封丘縣

我本漁樵孟諸野一生自是悠悠者乍可狂歌  
草澤中寧堪作吏風塵下祇言小邑無所爲公  
門百事皆有期拜迎官長心欲碎鞭撻黎庶令  
人悲歸來向家問妻子舉家盡笑今如此生事  
應須南畝田世情付與東流水夢想舊山安在  
哉爲銜君命日遲迴乃知梅福徒爲爾轉憶陶  
潛歸去來

題李別駕壁

去鄉不遠逢知己握手相歡得如此禮樂遙傳  
魯伯禽賓客爭過魏公子酒筵莫散明月上櫺

馬常鳴春風起一生稱意能幾人今日從君問  
終始

邯鄲少年行

邯鄲城南游俠子自矜生長邯鄲裏千場縱博  
家仍富幾處報讎身不死宅中歌笑日紛紛門  
外車馬如雲屯未知肝膽向誰是令人却憶平  
原君不見今人交態薄黃金用盡還踈索以茲  
感歎辭舊遊更於時事無所求且與少年飲美  
酒往來射獵西山頭

古大梁行

古城莽蒼饒荆榛驅馬荒城愁殺人魏王宮觀  
盡禾黍信陵賓客隨灰塵憶昨雄都舊朝市軒  
車照耀歌鍾起軍容帶甲三十萬國步連營五  
千里全盛須臾那可論高臺曲池無復存遺墟  
但見狐狸迹古地空餘草木根暮天搖落傷懷  
抱撫劒悲歌對秋草俠客猶傳朱亥名行人尚  
識夷門道白壁黃金萬戶侯寶刀駿馬填山丘  
年代淒涼不可問往來唯見水東流

別楊山人

不到嵩陽動十年舊時心事已徒然一二故人

不復見三十六峯猶眼前夷門二月柳條色流  
鶯數聲淚沾臆鑿井耕田不我招知君以此忘  
帝力山人好去嵩陽路惟余眷眷長相憶

送田少府貶蒼梧

沉吟對遷客惆悵西南天昔爲一官未得意今  
向萬里令人憐念茲斗酒成睽間停舟嘆君日  
將晏遠樹應連北地春行人却羨南歸鴈丈夫  
窮達未可知看君不合長數竒江山到處堪乘  
興楊柳青青那足悲

別李景參



離心忽悵然策馬對秋天孟諸薄暮涼風起歸  
客相逢渡睢水昨時携手已十年今日分途各  
千里歲物蕭條滿路岐此行浩蕩令人悲家貧  
羨爾有微祿欲往從之何所之

送郭處士往萊蕪兼寄苟山人

君爲東蒙客往來東蒙畔雲卧臨嶧陽山行窮  
日觀少年詞賦皆可聽秀眉白面風清冷身上  
未曾染名利口中獨未知羶腥今日還山意無  
極豈辭世路多相識歸見萊蕪九十翁爲論別  
後長相憶

同李九士曹觀壁畫雲作

始知帝鄉客能畫蒼梧雲秋天萬里一片色只  
疑飛盡猶氛氲

送別

昨夜離心正鬱陶三更白露西風高螢飛木落  
何浙瀝此時夢見西歸客曙鍾寥亮三四聲東  
隣嘶馬使人驚攬衣出戶一相送唯見歸雲縱  
復橫

崔司錄宅燕大理李卿

多雨殊未已秋雲更沉沉洛陽故人初解印山

東小吏來相尋上卿才大名不朽早朝至尊慕  
求友豁達常推海內賢殷勤但酌樽中酒飲醉  
欲言歸 門前駟馬光照衣路傍觀者徒唧  
唧我公不以爲是非

畫馬篇

君侯櫪上駟貌在丹青中馬毛連錢蹄鐵色圖  
畫光輝驕玉勒馬行不動勢若來權竒蹴踏無  
塵埃感茲絕代稱妙手遂令談者不容口麒麟  
獨步自可珍駑駘萬疋知何有終未知他櫪上  
駟載華轂騁飛鴻荷君翦拂與君用一日千里

如旋風

詠馬鞭

龍竹養根凡幾年工人截之爲長鞭一節一目  
皆天然珠重重星連連繞指柔純金堅繩不直  
規不圓把向空中捎一聲良馬有心日馳千

贈別晉三處士

有人家住清河源渡河問我遊梁園手持道經  
注已畢心知內篇口不言盧門十年見秋草此  
心惆悵誰能道知己從來不易知慕君爲人與  
君好別時九月桑葉疎出門千里無行車愛君

且欲君先達今上求賢早上書

九月九日酬顏少府

簷前白日應可惜籬下黃花爲誰有行子迎霜  
未授衣主人得錢始沽酒蘇秦顛顛人多厭蔡  
澤棲遲世看醜縱使登高只斷腸不如獨坐空  
搔首

賦得還山吟送沈四山人

還山吟天高日暮寒山深送君還山識君心人  
生老大須恣意看君解作一生事山間偃仰無  
不至石泉淙淙若風雨桂花松子常滿地賣藥

囊中應有錢還山服藥又長年白雲勸盡杯中  
物明月相隨何處眠眠時憶問醒時意夢魂可  
以相周旋

見人臂蒼鷹

寒楚十二月蒼鷹八九毛寄言燕雀莫相忌自  
有雲霄萬里高

古歌行

君不見漢家三葉從代至高皇舊臣多富貴天  
子垂衣方晏如廟堂拱手無餘議蒼生偃卧休  
征戰露臺百金以爲費田舍老翁不出門洛陽

少年莫論事

同鮮于洛陽於畢負外宅觀畫馬歌

知君愛鳴琴仍好千里馬永日恒思單父中有  
時心到宛城下遇客丹青天下才白生胡雛控  
龍媒主人娛賓畫障開只言騏驥西極來半壁  
趨趨勢不住滿堂風飄颻然度家僮愕視欲先  
鞭櫪馬驚嘶還屢顧始知物妙皆可憐燕昭市  
駿豈徒然縱令翦拂無所用猶勝駑駘在眼前

送渾將軍出塞

將軍族貴兵且強漢家已是渾耶王子孫相承

在朝野至今部曲燕支下控弦盡用陰山兒登  
陣常騎大宛馬銀鞍玉勒繡螭弧每逐嫖姚破  
骨都李廣從來先將士衛青未肯學孫吳傳有  
沙場千萬騎昨日邊庭羽書至城頭畫角三四  
聲匣裏寶刀晝夜鳴意氣能甘萬里去辛勤動  
作一年行黃雲白草無前後朝建旌旗夕刁斗  
塞下應多俠少年關西不見春楊柳從軍借問  
所從誰擊劍酣歌當此時遠別無輕繞朝策平  
戎早寄仲宣詩

同河南李少尹畢負外宅夜飲時洛陽

告捷遂作春酒歌

故人美酒勝濁醪故人清詞合風騷長歌滿酌  
惟吾曹高談正可揮塵毛半醉忽然持蟹螯洛  
陽告捷傾前後武侯腰間印如斗郎官無事時  
飲酒杯中綠蟻吹轉來甕上飛花拂還有前年  
持節將楚兵去年留司在東京今年復拜二千  
石盛夏五月西南行彭門劔門蜀山裏昨逢軍  
人劫奪我到家但見妻與子賴得飲君春酒數  
十杯不然令我愁欲死

寄宿田家

田家老翁住東陂說道平生隱在茲鬢白未曾  
記日月山青每到識春時門前種柳深成巷野  
谷流泉添入池牛壯日耕十畝地人閑常掃一  
茆茨客來滿酌清罇酒感興平吟才子詩巖際  
窟中藏麴鼠潭邊竹裏隱鷓鴣村墟日落行人  
少醉後無心怯路岐今夜只應還寄宿明朝拂  
曙與君辭

人日寄杜二拾遺

人日題詩寄草堂遙憐故人思故鄉柳條弄色  
不忍見梅花滿枝空斷腸身在南蕃無所預心

高常侍集卷五  
十一  
懷百憂復千慮今年人日空相憶明年人日知  
何處一卧東山三十春豈知書劍老風塵龍鍾  
還忝二千石愧爾東西南北人

塞下曲

君不見芳樹枝春花落盡蜂不窺君不見梁上  
泥秋風始高燕不栖蕩子從軍事征戰蛾眉嬾  
娟守空閨獨宿自然堪下淚况復時聞烏夜啼

高常侍集卷第五

高常侍集卷第六

五言律詩

武威同諸公過楊七山人

幕府日多暇田家歲復登相知恨不早乘興乃  
無恒窮巷在喬木深齋垂古藤邊城唯有醉此  
外更何能

入昌松東界山行

鳥道幾登頓馬蹄無暫閒崎嶇出長坂合水猶  
前山石激水流處天寒松色間王程應未盡且  
莫顧刀鐔

送白少府送兵之隴右

殘更登隴首遠別指臨洮爲問關中事何如州  
縣勞軍容隨赤羽樹色引青袍誰斷單于臂今  
年太白高

河西送李十七

邊城多遠別此去莫徒然問禮知才子登科及  
少年出門看落日驅馬向秋天高價人爭重行  
當早着鞭

醉後贈張九旭

世上謾相識此翁殊不然興來書自聖醉後語

猶顛白髮老閑事青雲在目前牀頭一壺酒能  
更幾回眠

酬衛八雪中見贈

季冬憶淇上落日歸山樊舊宅帶流水平田臨  
古村雪中望來信醉裏開衡門果得希代寶緘  
之那可論

同衛八題陸少府書齋

知君薄州縣好靜無冬春散帙至棲鳥明燈留  
故人深房臘酒熟高院梅花新若是周旋地當  
令風義親

送張瑤貶五溪尉

他日維貞幹明時懸鑊鄒江山遙去國妻子獨  
還家離別無嫌遠沉浮勿強嗟南登有詞賦知  
爾弔長沙

別韋五

徒然酌杯酒不覺散人愁相識仍遠別欲歸翻  
旅遊夏雲滿郊甸明月照河洲莫恨征途遠東  
看漳水流

別劉大校書

昔日京華去知君才望新應猶作賦好莫嘆在

官負且復傷遠別不然愁此身青楓幾萬里江  
上一歸人

宋中別司功叔各賦一物

商丘試一望隱隱帶秋天地與星辰在城將大  
路遷干戈悲昔事墟落對窮年即此傷離緒凄  
凄賦酒筵

送蔡十二之海上

黯然何所爲相對益悲酸季弟念離別賢兄救  
急難河流冰處盡海路雪中寒尚有南飛鴈知  
君不忍看



宴郭校書因之有別

綵服趨庭訓分交載酒過芸香名早著蓬轉事  
仍多苦戰知機息窮愁柰別何雲霄莫相待年  
鬢已蹉跎

別韋兵曹

離別長千里相逢數十年此心應不變他事已  
徒然惆悵春光裏蹉跎柳色前逢時當自取有  
爾欲先鞭

獨孤判官部送兵

餞君嗟遠別爲客念周旋征路今如此前軍猶

眇然出關逢漢壁登隴望胡天亦是封侯地期  
君早著鞭

別從甥萬盈

諸生曰萬盈四十乃知名宅相予偏重家丘人  
莫輕美才應自料苦節豈無成莫以山田薄今  
春又不耕

別崔少府

知君少得意汶上掩柴扉寒食仍留火春風未  
授衣皆言黃綬屈早向青雲飛借問他鄉事今  
年歸不歸

別馮判官

碣石遼西地，漁陽薊北天。  
關山唯一道，雨雪盡三邊。  
才子方爲客，將軍正渴賢。  
遙知幕府下書，記日翩翩。

同李太守北池泛舟宴高平鄭太守

每揖龔黃事，還陪李郭舟。  
雲從四岳起，水向百城流。  
幽意隨登陟，嘉言即獻酬。  
乃知縫掖貴，今日對諸侯。

同崔員外綦毋拾遺九日宴京兆府李

士曹

今日好相見，群賢仍廢曹。  
晚晴催翰墨，秋興引風騷。  
絳葉擁虛砌，黃花隨濁醪。  
閉門無不可，何事更登高。

送崔功曹赴越

傳有東南別，題詩報客居。  
江山知不厭，州縣復何如。  
莫恨吳歛曲，當看越絕書。  
今朝欲乘興，隨爾食鱸魚。

送蹇秀才赴臨洮

悵望日千里，如何今二毛。  
猶思陽谷去，莫厭隴山高。  
倚馬見雄筆，隨身唯寶刀。  
料君終自致，勳

業在臨洮

淇上送韋司倉往滑臺

飲酒莫辭醉醉多適不愁孰知非遠別終念對  
窮秋滑臺門外見淇水眼前流君去應回首風  
波滿渡頭

使青夷軍入居庸三首

匹馬行將久征途去轉難不知邊地別祗訝客  
衣單溪冷泉聲苦山空木葉乾莫言關塞極雲  
雪尚漫漫

古鎮青山口寒風落日時巖巒鳥不過冰雪馬

堪遲出塞應無策還家賴有期東山足松桂歸  
去結茅茨

登頓驅征騎棲遲愧寶刀遠行今若此微祿果  
徒勞絕坂水連下群峯雲共高自堪成白首何  
事一青袍

自薊北歸

驅馬薊門北北風邊馬哀蒼茫遠山口豁達胡  
天關五將已深入前軍止半迴誰憐不得意長  
劍獨歸來

途中寄徐錄事

落日風雨至秋天鴻鴈初離憂不堪比旅館復  
何如君又幾時去我知音信踈空多篋中贈長  
見右軍書

廣陵別鄭處士

落日知分手春風莫斷腸興來無不愜才在亦  
何傷溪水堪垂釣江田耐插秧人生只爲此亦  
足傲羲皇

別孫訢

離人去復留白馬黑貂裘屈指論前事停鞭惜  
舊遊帝鄉那可忘旅館日堪愁誰念無知己年

年唯水流

送劉評事充朔方判官賦得征馬嘶

征馬向邊州蕭蕭嘶不休思深應帶別聲斷爲  
兼秋坡路風將遠關山月共愁贈君從此去何  
日大刀頭

送魏八

更沽淇上酒還泛驛前舟爲惜故人去復憐嘶  
馬愁雲山行處合風雨與中秋北路無知己明  
珠莫暗投

贈別褚山人

攜手贈將行山人道姓名光陰薊子訓才術褚  
先生墻上梨花白罇中桂酒清洛陽無二價猶  
是慕風聲

別王八

征馬嘶長路離人挹佩刀客來東道遠歸去北  
風高時候何蕭索鄉心更鬱陶傳君遇知己行  
日有綈袍

送董判官

逢君說行邁倚劍別交親幙府爲才子將軍作  
主人近關多雨雪出塞有風塵長策須當用男

兒莫顧身

同群公登濮陽聖佛寺閣

落日登臨處悠然意不窮佛因初地識人覺四  
天空來鴈清霜後孤帆遠樹中徘徊傷寓目蕭  
索對寒風

同群公十月朝宴李太守宅

良牧徵高賞褰帷問考槃歲時當正月甲子入  
初寒已聽甘棠頌欣陪旨酒歡仍憐門下客不  
作布衣看

送裴別將之安西

絕域眇難躋悠然信馬蹄風塵驚跋涉搖落怨  
駸携地出流沙外天長甲子西少年無不可行  
矣莫悽悽

部落曲

蕃軍傍塞遊代馬噴風秋老將垂金甲閑支着  
錦裘琫戈蒙豹尾紅旆插狼頭日暮天山下鳴  
笳漢使愁

送鄭侍御謫閩中

謫去君無恨閩中我昔過大都秋鴈少只是夜  
猿多東路雲山合南天瘴癘和自當逢雨露行

矣慎風波

送李侍御赴安西

行子對飛蓬金鞭指鐵驄功名萬里外心事一  
杯中虜障燕支北秦城太白東離魂莫惆悵看  
取寶刀雄

贈杜二拾遺

傳道招提客詩書自討論佛香時入院僧飯屢  
過門聽法還應難尋經剩欲翻草玄今已畢此  
外復何言

高常侍集卷第六

高常侍集卷第七

五言排律

秋日作

端居值秋節此日更愁辛寂寞無一事蒿萊通  
四鄰閉門生白髮迴首憶青春歲月不相待交  
遊隨衆人雲霄何處託愚直有誰親舉酒聊自  
勸窮通信爾身

陪竇侍御泛靈雲池

白露時先降清川思不窮江湖仍塞上舟楫在  
軍中舞換臨津樹歌饒向晚風夕陽連積水邊

色滿秋空乘興宜投轄邀歡莫避駘誰憐持弱  
羽猶欲伴鷓鴣

陪竇侍御靈雲南亭宴詩 并序

涼州近胡高下其池亭蓋以耀蕃落也幕府董  
帥雄勇徑踐戎庭自陽關而西猶枕席矣軍中  
無事君子飲食宴樂宜哉白簡在邊清秋多興  
况水具舟楫山兼亭臺始臨泛而寫煩俄登陟  
以寄傲絲桐徐奏林水更爽觴蒲萄以遞歡指  
蘭茝而可掇胡天一望雲物蒼然雨蕭蕭而牧  
馬聲斷風嫋嫋而邊歌幾處又足悲矣負外李

公曰七日者何牛女之夕也夫賢者何得謹其  
時請賦南亭詩列之于後

人幽宜眺聽目極喜亭臺風景知愁在關山憶  
夢迴祗言殊語默何意忝遊陪連唱波瀾動冥  
搜物象開新秋歸遠樹殘雨擁輕雷簷外長天  
盡尊前獨鳥來常吟塞下曲多謝幕中才河漢  
徒相望嘉期安在哉

和竇侍御登涼州七級浮圖之作

化塔圯中起孤高宜上躋鐵冠雄賞眺金界寵  
招攜空色在軒戶邊聲連鼓鼙天寒萬里北地



高常侍集卷七  
豁九州西清興揖才彥峻風和端倪始知陽春  
後具物皆筌蹄

同熊少府題盧主簿茅齋

虛院野情在茅齋秋興存孝廉趨下位才子出  
高門乃繼幽人靜能令學者尊江山歸謝客神  
鬼下劉根階樹時攀折牕書任討論自堪成獨  
往何必武陵源

同未五題盧使君義井

高義唯良牧深仁自下車寧知鑿井處還是飲  
冰餘地即泉源久人當汲引初體清能鑿物色

洞每含虛上善滋來往中和浹里閭濟時應未  
竭懷惠復何如

同郭十題楊主簿新廳

華館曙沉沉惟良正在今用材兼柱石開物象  
高深更得芝蘭地兼滎枳棘林向風扃戟戶當  
署近棠陰勿改安卑節聊閑理劇心多君有知  
已一和郢中吟

送蔡少府赴登州推事

膠東連即墨萊水入滄溟國小常多事人訛屢  
抵刑公才徵郡邑詔使出郊垆標格誰當犯風

謠信可聽崢嶸大峴口邈迤汶陽亭地迥雲偏  
白天秋山更青祖筵方卜畫王事急侵星勸爾  
將爲德斯言蓋有聽

秦中送李九赴越

攜手望千里于今將十年如何每離別心事復  
迤邐適越雖有以出關終耿耿愁臨不可向長  
路或難前吳會獨行客山陰秋夜船謝家徵故  
事禹穴訪遺編鏡水君所憶尊羹予舊便歸來  
莫忘此兼示濟江篇

古樂府飛龍曲留上陳左相

德以精靈降時膺夢寐求蒼生謝安石天子富  
平侯尊俎資高論巖廊挹大猷相門連戶牖卿  
族嗣弓裘豁達雲開霽清明月映秋能爲吉甫  
頌善用子房籌階砌思攀陟門闌尚阻修高山  
不易仰大匠本難投跡與松喬合心緣啓沃留  
公才山吏部書癖杜荊州幸沐千年聖何辭一  
尉休折腰知寵辱迴首見沉浮天地莊生馬江  
湖范蠡舟道遙堪自樂浩蕩信無憂去此從黃  
綬歸歟任白頭風塵與霄漢瞻望日悠悠

留上李右相

風俗登淳古君臣挹大庭深沉謀九德密勿契  
千齡獨立調元氣清心豁窅冥本枝連帝系長  
策冠生靈傳說明殷道蕭何律漢刑鈞衡持國  
柄柱石總賢經隱軫江山藻氛氳鼎彝銘興中  
皆白雪身外即丹青江海呼窮鳥詩書問聚縈  
吹噓成羽翼提握動芳馨倚伏悲還笑棲遲醉  
復醒恩榮初就列含育忝宵形有竊江山惠無  
時枕席寧壯心瞻落景生事感流萍莫以才難  
用終期善易聽未爲門下客徒謝少微星

辟陽城

荒城在高岸凌眺俯清淇傳道漢天子而封審  
食其奸淫且不戮茅土孰云宜何得英雄主返  
令兒女欺母儀良已失臣節豈如斯太息一朝  
事乃令人所嗤

信安王幕府詩

并序

開元二十年國家有事林胡詔禮部尚書信安  
王總戎大舉時考功郎中王公勳郎中劉公  
主客郎中魏公侍御史李公監察御史崔公咸  
在幕府詩以頌美數公見于詞

雲紀軒皇代星高太白年廟堂咨上策幕府制

中權盤石藩維固昇壇禮樂先國章榮印綬公  
服貴貂蟬樂善旌深德輸忠格上玄剪桐光寵  
錫題劔美貞堅聖祚雄圖廣師貞武德虔雷霆  
七校發旌旆五營連華省微群又霜臺舉二賢  
豈伊公望遠曾是茂才遷並秉韜鈴術兼該翰  
墨筵帝恩麟閣像臣獻栢梁篇振玉登遼甸攬  
金歷薊墟度河飛羽檄橫海泛樓船比伐聲逾  
邁東征務以專講戎喧豕野料敵靜居延軍勢  
持三畧兵戎自九天朝瞻授鉞去時聽偃戈旋  
大漠風沙裏長城雨雪邊雲端臨碣石波際隱

朝鮮夜壁衝高斗寒空駐綵旃倚弓玄兔月飲  
馬白狼川庶物隨交泰蒼生解倒懸四郊增氣  
象萬里絕風煙關塞鴻勳著京華甲第全落梅  
橫吹後春色凱歌前直道常兼濟微才獨棄捐  
曳裾誠已矣投筆尚悽然作賦同元淑能詩匪  
仲宣雲霄不可望空欲仰神仙

奉酬睢陽李太守

公族稱王佐朝經允帝求本枝疆我李盤石冠  
諸劉禮樂光輝盛山河氣象幽系高周柱史名  
重晉陽秋華省應推擇青雲寵宴遊握蘭多具

美前席有嘉謀賦得黃金賜言皆白壁酬着鞭  
驅駟馬操刃解金牛出鎮兼方伯承家復列侯  
朝瞻孔北海時用杜荊州廣固纔登陟毘陵忽  
阻修三台冀入夢四嶽尚分憂郡邑連京口山  
川望石頭海門當建節江路引鳴騶俗見中興  
理人逢至道休先移白額橫更息赭衣偷梁國  
歌來晚徐方怨不留豈伊齊政術將以變澆浮  
訟簡知能吏刑寬察要囚坐堂風偃草行縣雨  
隨輶地是蒙莊宅城遺闕伯丘孝王餘井徑微  
子故田疇冬至招搖轉天寒蟬蛭收猿巖飛雨

雪兔苑落梧楸列戟霜侵戶褰幃月在鈞好賢  
常解榻乘興每登樓逸足橫千里高談注九流  
詩題青玉案衣贈黑貂裘窮巷軒車靜閑齋耳  
目愁未能方管樂翻欲慕巢由講德良難敵觀  
風豈易儔寸心仍有適江海一扁舟

奉酬路太守見贈之作

盛才膺命代高價動良時帝簡登藩翰人和發  
詠思神仙去華省鴛鷺憶丹墀清淨能無事優  
游即賦詩江山分想像雲物共萎蕤逸氣劉公  
幹玄言向子期多慙汲引速翻愧激昂遲相馬

知何限登龍反自疑風塵吏道迫行邁旅心悲  
拙疾徒爲爾窮愁欲問誰秋庭一片葉朝鏡數  
莖絲州縣甘無取丘園悔莫追瓊瑤生篋笥光  
景滿茅茨他日青霄騎猶應訪所之

餞宋八充彭中丞判官之嶺外

覩君濟時畧使我氣填膺長策竟不用高才徒  
見稱一朝知已達累日詔書徵羽翮忽然就風  
飈誰敢凌舉鞭趨嶺嶠屈指冒炎蒸北鴈送馳  
驛南人思飲冰彼邦本倔强習俗多驕矜翠羽  
干平法黃金撓直繩若將除害馬慎勿信蒼蠅

魑魅寧無患忠貞適有憑猿啼山不斷鷲跼路  
難登海岸出交趾江城連始興繡衣當節制幕  
府盛威稜勿憚九疑險須令百越澄立談多感  
激行李即嚴凝離別胡爲者雲霄遲爾昇

送柴司戶充劉卿判官之嶺外

嶺外資雄鎮朝端寵節旄月卿臨幕府星使出  
詞曹海對羊城闊山連象郡高風霜驅瘴癘忠  
信涉波濤別恨隨流水交情脫寶刀有才無不  
適行矣莫徒勞

同李員外賀哥舒大夫破九曲之作

遙傳副丞相昨日破西蕃作氣群山動揚軍大  
旆翻奇兵邀轉戰連弩絕歸奔泉噴諸戎血風  
驅死虜魂頭飛攢萬戟面縛聚轅門鬼哭黃埃  
暮天愁白日昏石城與巖險鐵騎皆雲屯長策  
一言決高蹤百代存威稜懾沙漠忠義感乾坤  
老將黯無色儒生安敢論解圍憑廟筭止殺報  
君恩唯有關河眇蒼茫空樹墩

酬河南節度使賀蘭大夫見贈之作

高閣憑欄檻中軍倚旆旌感時常激切於已即  
忘情河華屯妖氣伊瀍有戰聲媿無戡難策多

謝出師名秉鉞知恩重臨戎覺命輕股肱瞻列  
岳唇齒賴長城隱隱摧鋒勢光光弄印榮魯連  
真義士陸遜豈書生直道寧殊智先鞭忽抗行  
楚雲隨去馬淮月尚連營撫劍堪投分悲歌益  
不平從來重然諾况值欲橫行

赴彭州山行之作

峭壁連崆峒攢峯疊翠微鳥聲堪駐馬林色可  
忘機恠石時侵徑輕蘿乍拂衣路長愁作客年  
老更思歸且悅巖巒勝寧嗟意緒違山行應未  
盡誰與玩芳菲

東平旅遊奉贈薛太守二十四韻

頌美馳千古欽賢仰大猷晉公標逸氣汾水注  
長流神與公忠節天生將相儔青雲本自負赤  
縣獨推尤御史風逾勁郎官草屢修鴛鸞粉署  
起鷹隼栢臺秋出入交三事飛鳴揖五侯軍書  
陳上策廷議借前籌肅肅趨朝列雖雖引帝求  
一麾俄出守千里再分憂不改任棠水仍傳晏  
子裘歌謠隨舉扇旌旆逐鳴騶郡國長河遶川  
源大野幽地連堯泰嶽山向禹青州汶上春帆  
渡秦亭晚日愁遺墟當少昊懸象逼奎婁即此

逢清鑒終然喜暗投叨承解榻禮更得問縑遊  
高興陪登陟嘉言忝獻酬觀棊知戰勝探象會  
冥搜眺聽情何限冲融惠勿休祗應齊語默寧  
肯問沉浮然諾長懷季栖遑輒累丘平生感知  
已方寸豈悠悠

真定即事奉贈韋使君二十八韻

漂泊懷書客遲迴此路隅問津驚棄置投刺忽  
踟躕方伯恩彌重蒼生詠已蘇郡稱廉叔度朝  
議管夷吾乃繼三台側仍將四嶽俱江山澄氣  
象崖谷倚冰壺詔寵金門策官榮葉縣鳧擢才



登粉署飛步躡雲衢起草徵調墨焚香即宴娛  
光華揚盛矣霄漢在茲乎隱軫推公望逶迤協  
帝俞軒車辭魏闕旌節副幽都始佩仙郎印俄  
兼太守符尤多蜀郡理更得潁川謨城邑推雄  
鎮山川列簡圖舊燕當絕漠全趙對平蕪曠野  
何彌漫長亭復鬱紆始泉遺俗近活水戰場無  
月換思鄉陌星迴記斗樞歲容歸萬象和氣發  
鴻鑪淪落而誰遇栖遑有是夫不才羞擁腫干  
祿謝侏儒契闊慙行邁羈離憶有于田園同季  
子儲畜異陶朱方欲呈高義吹噓揖大巫永懷  
吐肝膽猶憚阻榮枯解榻情何限忘言道未殊  
從來貴縫掖應是念窮途

高常侍集卷第七

高常侍集卷第八

七言律詩

金城北樓

北樓西望滿晴空積水連山勝畫中湍上急流  
聲若箭城頭殘月勢如弓垂竿已謝磻溪老體  
道猶思塞上翁為問邊庭更何事至今羌笛怨  
無窮

送前衛縣李宋少府

黃鳥翩翩楊柳垂春風送客使人悲怨別自驚  
千里外論交却憶十年時雲開汶水孤帆遠路

繞梁山匹馬遲此地從來可乘輿留君不住益  
淒其

夜別韋司士

高館張燈酒復清夜鍾殘月鴈歸聲只言啼鳥  
堪求侶無那春風欲送行黃河曲裏沙爲岸白  
馬津邊柳向城莫怨他鄉暫離別知君到處有  
逢迎

同顏少府旅宦秋中

傳君昨夜悵然悲獨坐新齋木落時逸氣舊來  
凌燕雀高才何得混妍媸跡留黃綬人多嘆心

在青雲世莫知不是鬼神無正直從來州縣有  
瑕疵

同陳留崔司戶早春宴蓬池

同官載酒出郊圻晴日東馳鴈北飛隔岸春雲  
邀翰墨傍簷垂柳報芳菲池邊轉覺虛無盡臺  
上偏宜酌酹歸州縣徒勞那可度後時連騎莫  
相違

送李少府貶峽中王少府貶長沙

嗟君此別意何如駐馬銜杯問謫居巫峽啼猿  
數行淚衡陽歸鴈幾封書青楓江上秋天遠白

高帝侍集卷六  
帝城邊古木踈聖代即今多雨露暫時分手莫  
躊躇

重陽

節物驚心兩鬢華東籬空繞未開花百年將半  
仕三已五畝就荒天一涯豈有白衣來剝喙亦  
從烏帽自欹斜真成獨坐空搔首門柳蕭蕭噪  
暮鴉

五言絕句

詠史

尚有綈袍贈應憐范叔寒不知天下士猶作布

衣看

田家春望

出門何所見春色滿平蕪可歎無知己高陽一  
酒徒

閒居

柳色驚心事春風厭索居方知一杯酒猶勝百  
家書

送兵到薊北

積雪與天迥屯軍連塞愁誰知此行邁不爲覓  
封侯

封丘作

州縣才難適雲山道欲窮揣摩慙黠吏棲隱謝愚公

同群公題張處士菜園

畊地桑柘間地肥菜常熟爲問葵藿資何如廟堂肉

逢謝偃

紅顏創爲別白髮始相逢唯餘昔時慮無復舊時容

感五溪薺菜

兩京作薺賣五溪無人採夷夏雖有殊氣味終不改

七言絕句

除夜作

旅館寒燈獨不眠客心何事轉淒然故鄉今夜思千里霜鬢明朝又一年

初至封丘作

可憐薄暮宦遊子獨卧虛齋思無已去家百里不得歸到官數日秋風起

別董大二首

千里黃雲白日曛北風吹鴈雪紛紛莫愁前路  
無知己天下誰人不識君  
六翮飄颻私自憐一離京洛十餘年丈夫貧賤  
應未足今日相逢無酒錢

營州歌

營州少年厭原野皮裘蒙茸獵城下虜酒千鍾  
不醉人胡兒十歲能騎馬

送桂陽孝廉

桂陽少年西入秦數經甲科猶白身即今江海  
一歸客他日雲霄萬里人

聽張立本女吟

危冠廣袖楚宮粧獨步閑庭逐夜涼自把玉簪  
敲砌竹清歌一曲月如霜

塞上聽吹笛

雪淨胡天牧馬還月明羌笛戍樓間借問梅花  
何處落風吹一夜滿關山

送李少府

相逢旅館意多違暮雪初晴候鴈飛主人酒盡  
君未醉薄暮途遙歸不歸

九曲詞三首

許國從來徹廟堂連年不爲在壇場將軍天上  
封侯印御史臺中異姓王  
萬騎爭歌楊柳春千場對舞繡騏驎到處盡逢  
歡洽事相看總是太平人  
鐵騎橫行鐵嶺頭西看邏逆取封侯青海只今  
將飲馬黃河不用更防秋

高常侍集卷第八

高常侍集卷第九

表

爲東平薛太守進王氏瑞詩表

臣某言符瑞之興實由王化詩歌之作有自國  
風伏見范陽盧某母瑯琊王氏性合希夷體於  
靜默精微道本馳騫元關旁通天地之心預紀  
休徵之盛去景龍二載撰天寶迴文詩凡八百  
一十二字循環有數理一作若寒暑之遞遷應變  
無窮謂陰陽之莫測誠其子曰吾歿之後爾密  
記之當逢大道之朝必遇非常之主則真圖之

製便可上言君親之義不違犬馬之誠斯在臣  
早識其子常與臣言星霜屢移書奏仍闕蓋以  
歲月滋久旨趣幽微沉吟取耳目之前倏忽應  
禎祥之後伏惟皇帝陛下乘道御極乃聖興化  
三日月之並明一乾坤而同德梯航萬里爭飲  
淳和之風臣妾四夷盡歸仁壽之域今陛下務  
於道道可盡乎法於天天實長久是知與道齊  
運比天同休無疆之休乃在茲矣則王氏之美  
其可替乎章句粲然所謂沒而不朽者也臣適  
誠惶誠恐頓首頓首昔漢幸甘泉且昧神君之

語周窮轍迹徒稱王母之謠豈若迥出名言高  
懸響像讚皇王之丕命運宮商於景福且夫靈  
芝嘉禾草木之瑞者黃龍丹雀禽獸之瑞者猶  
能光揚帝載標榜頌聲方之真圖彼未爲得特  
望編之史策列在樂章則陛下先於天而聽於  
人也臣才術淺劣謬忝藩條曾微涓塵以答萬  
一但馳北極每切子牟之戀遙奉南山願効封  
人之祝

謝封丘縣尉表

臣適言臣田野賤品生逢聖時得與昆蟲俱霑



雨露常謂老死林藪不識闕庭豈其巖穴又寧  
弓旌未已賢才畢用搜訪仍勤見堯舜之爲心  
荷乾坤之善貸臣藝業無取謬當推薦自天有  
命追赴上京曾未浹旬又拜臣職顧慙虛受實  
懼曠官捧日無階戴天何報臣已於正衙辭訖  
即以今日赴官無任犬馬之志謹奉表陳謝以  
聞臣適誠惶誠恐頓首頓首

謝上彭州刺史表

臣適言伏奉聖恩授臣彭州刺史寵光自天喜  
懼交集臣某誠惶誠恐頓首頓首死罪死罪臣

本野人匪求名達始自一尉曾未十年北使河  
湟南出江漢奉上皇非常之遇蒙陛下特達之  
恩累登諫司頻歷憲府比逆亂侵軼淮楚震驚  
遂兼節制之權空忝腹心之寄銜命感激思効  
駑駘敢竭公忠動無迴避而智不周物才難適  
時俄塵聖聽果速官謗實謂死亡可待流竄在  
茲陛下弘覆載之恩明日月之鑒始拜官允今  
列藩條雨露之恩更霑枯朽陽和之氣忽曜沉  
埋天高聽卑臣獨何幸臣某誠惶誠恐頓首頓  
首死罪死罪臣聞忠臣事君雖死無貳臣今未

死敢忘至公伏惟陛下哀臣愚蒙矜臣方直臣雖在遠若近天顏臣以今月七日到所部上訖宣布德音草木增氣敷陳眷澤黎庶昭蘇無任悃欵屏營之至謹附驛奉表陳謝以聞臣某誠惶誠恐死罪死罪謹言

謝上劔南節度使表

臣適言受脤登壇必先禮樂剖符攬轡是委腹心方將總領諸侯整訓戎旅分二南之名器創七德之籌謀君無虛授臣無虛受授受之際任用匪輕况全蜀奧區非賢勿守方面重寄擇善

而從顧臣庸愚豈合祗拜遠奉恩制不敢逡巡即以二月二日上訖天威在顏風俗思變飲水食藥策朽磨鉛臣往在淮陽已無展效出臨彭蜀又乏循良雖聖恩不移而微臣益懼謹當宣揚皇化鎮撫蕃蠻訓卒吏兵翦除夷獠庶冀毫髮增益山丘陛下慎擇任人朝廷多士伏願更徵英彥俾付西南許臣暮年歸侍丹闕臣卜之懇君父之慈天高聽卑下情上達軍府多事稅賦方殷臣今逐便指撝乘間式遏救蒼生之疲弊寬陛下之憂勤乃臣丹誠悽悽於夙夜無任

一高常侍集卷九  
四  
控款之至謹遣洋州司馬攝參謀臣路球謹奉  
表陳謝以聞

賀安祿山死表

臣適言臣得河南道及諸州牒皆言逆賊安祿  
山苦痛而死手足俱落眼鼻殘壞臣聞負天者  
天誅負神者神怒其道甚著今乃克彰臣適誠  
懽誠喜頓首頓首逆賊孤負聖朝造作氛祲嘯  
聚吠堯之犬倚賴射天之矢殘酷生靈斯亦至  
矣臣恨不得血賊於萬戟肉賊於三軍空隨率  
土之歡遠奉九霄之慶即當總統將士憑恃威

靈驅未盡之犬羊覆已亡之巢穴無任踴躍慶  
快之至謹遣攝判官李翥奉表陳賀以聞

謝上淮南節度使表

臣適言以今日二日至廣陵以某日土訖流布  
聖澤江淮益深扇揚皇風草木增色臣誠惶誠  
恐頓首頓首伏惟皇帝陛下大明照臨純孝撫  
御漢主事親之日爰總六師軒后垂衣之辰再  
清四海猶以京華尚阻國步暫艱運黃石之神  
謀推赤心於人腹臣器非管樂殊孔明之自比  
識謝孫吳異山濤之暗合豈意聖私超等榮寵

存臻拔自周行寄重方面以時危而注意竊愧  
非才因國難以捐軀顧爲定分即當訓練將卒  
緝綏黎甯外以平賊爲心內以安人爲務庶使  
殄滅兇醜舞詠時邕報明主知臣之恩成微臣  
許國之節無任戴荷攀戀之至謹遣某官陳謝  
以聞

### 賀收城表

臣適言閏正月十六日中使郭羅至伏奉勅書  
示臣聖畧收復瀍洛掃殄兇徒臣適手之足之  
載欣載躍臣聞天不假易將而必誅守在四夷

難逃一面頃者逆胡稔惡竊據中都欲驅犬羊  
敢肆蜂蠆碎首於雷霆之下竄跡於城社之中  
猶貯殘魂擬收餘燼陛下澤深覆載功濟艱難  
神武必止於干戈窳區大拯於塗炭好生惡殺  
誠屢發於宸心走獸奔禽盡已罹於網目使風  
雲一變日月增輝巨海絕其揚波祆氛化爲和  
氣臣忝司戎律累奉德音昭宣眷謀底寧縣道  
天下幸甚豈獨方隅無任慶快之至謹遣洋州  
司馬貞外同正貞攝參謀臣路球奉表陳賀以  
聞

賀斬逆賊徐知道表

臣某言臣聞人臣無將將必誅之逆賊前成都少尹兼侍御史僞稱成都尹兼侍御史中丞劔南節度使徐知道中官攜養莫知姓族熒惑主司叨竊憲臺不能輸瀝肝膽以荅休明而懷挾姦邪嘯聚同惡傾竭府庫塗炭黎甿遂爲攙搶恣行蠱毒杜塞劔道擁遏朝經部署兇殘統領州縣曾未數日蕩壞一隅郊原已空市井如掃臣與邛南隣境左右叶心積聚軍糧應接師旅以今月二十三日大破賊衆同惡翻然共殺知

道六軍慶快雲物改容百姓欣歡景色相賀此皆社稷昭應神靈保持伏惟皇帝陛下一德動天無遠不屆兵戈向戢華夏克寧布蕭王之赤心竭臣子之丹款妖氛聚而皆盡郡國危而更安高視百王能事斯畢臣忝守藩翰罹此艱虞覩天地之廓清與飛動之咸若無任踴躍之至謹奉表陳賀以聞

請入奏表

右自徐知道作亂軍府畧空救弊扶傷事資安輯臣夙夜陳力啓處不遑伏以二陵攀號臣未

修壞奠萬方有主臣未覩天顏犬馬之誠不勝  
懇款候士卒稍練蕃夷漸寧特望聖恩許臣入  
奏謹錄奏聞伏聽勅旨謹奏

高常侍集卷第九

高常侍集卷第十

雜著

繡阿育王像讚

并序

阿育王繡像竇氏女奉爲亡妣太夫人蘇氏所  
建也嗚呼有以蓬首操行柴立孝思仰昊天  
之義矣可施於王化故能塵垢明鏡住持青  
永惟宿因獨見諸淨以爲霜雪風雨之思胡寧  
以報親功德莊嚴之深冀以益吾親矣乃自方  
文之室沛然廣大之願綵翠鮮秀光華可掬運

夫心眼之靈盡如相好之美瞻仰圍繞涕淚是悲俾像教之勿墜如佛身之有在夫莫大者孝也不泯者善也惟孝與善可以導達幽冥則我太夫人宜歸淨土矣嗚呼孝之至也感人無窮乃爲讚曰

佛不可見兮法亦難知惟我莊嚴兮本乎孝思儻幽冥兮昭乎景福彼淨土者可得而歸之

陳留郡上源新驛記

周官行夫掌邦國傳遽之事施於政者蓋有章焉皇唐之興盛於古制自京師四極經啓十道

道列于亭亭實以駟而亭惟三十里駟有上中下豐屋美食供億是爲人跡所窮帝命流洽用之遠者莫若於斯矣伊陳留雄稱山東聲殷海內昌大囂庶有梁魏之遺迹風煙雄兩河之眇襟帶九州之半泊皇華輶傳夷使駿奔出關而馳南向北戶山川水陸之役兆於是矣故上源所置與其難哉居里之衝瀕河之陽地形湫隘館次卑狹巽在堤下面於劇旁走庭以隅建步終坎車靡方駕騎無並鞭其鬱閉有如此者壬辰歲太守元公連率河南之三載也堯咨四岳

而人神理漢詔八使而風俗清舉德推賢事高  
典策革已成之弊持獨斷之明迨茲郵亭俯視  
頽朽何逼側蹇淺不稱其聲將圖鼎新豈曰仍  
舊顧謂長史李公曰夫開釋故實發揮制度不  
有攸居者誰其允協今奏計闕前先甲而往小  
大之務公其領之申命錄事參軍馮元掌曰維  
操繩墨者蓋用於正蘊廉慎者俾臨於財公以  
正身用財均力紀綱相佐善莫大焉復命浚儀  
令裴勝曰公之爲縣也簡易於理訓迪其源秉  
清白之一門據忠信之餘地夫忠以創物清而

守官立言有程指使而可於是北吞里室人以  
利遷也南豁路旅事無苟免也合土以峻墉攻  
木以高戶棟宇相翼群材如生茲所謂動乃有  
經徐而不費於戲久於否者宜以改作本於功  
者終乎永貞則亭之成焉我方訪王公澄清之  
初也公時膺邁德天與大才屬梁宋不登朝廷  
盱食求瘼之重不期然歟用能官去糝政人無  
菜色百城偃於迅風萬象納於明鏡乃因寮吏  
慨然於茲亭曰且夫木石之新者而猶可觀况  
人而自新孰不觀者又曰傳不云乎啓塞從時



用之善者而今而後吾以無事爲事焉君子是以知郵亭之可嘉而我公之清淨無窮也末吏不敏紀于貞石云

送竇侍御知河西和糴還京序

天子務西州之實歲糴億計何始於貴取而終以耗稱俾邊兵受寒戰馬多瘦輓域中之稅鑄海上之山江淮之人蓋奔命矣豈財用之地抑以從來將利害之鄉猶有所闕廟堂精思其故表竇公自憲闡而董之開釋叢脞之病發揮鹵莽之極政之大者不其然歟今農未力於必登

廉賈知夫勇賤於戲若惟斯之義以見天下之兵我幕府涼公勤勞王家常用此道干戈所適戎狄相弔宜哉八月旣望公於是領錢穀之要歸奏朝廷副節制郎中裴公軍司馬負外李公追臺閣之舊游惜軒車之遠別席樓船於池上泛雲物於城下胡笳羌笛繚繞隈隩儻羅眩莊映帶洲渚醉後歡甚東林日高語岐路於罇前指京華於天眇有若司直崔公之逸韻嘉其廷評數賢之間作適忝斯人之後敢拜首而叙云

樊少府廳獅猛贊

獅猛志猛猛於獅子紺眼星懸赤毛焰起銅爪  
鐵甲鋸牙鑿齒顧犀象則百隊山踰看熊羆則  
千群野死以此言威威可知矣仙尉樊公寫其  
象中崑崙却粹而屋壁欲動虎豹膽懾而訟庭  
已空稜稜兮隔簾飛霜颯颯兮滿院生風於是  
乎君子爲百獸之長遂識樊公爲百夫之雄

罷職還京次睢陽祭張巡許遠文

維乾元元年五月日太子詹事御史中丞高適  
謹以清酌之奠敬祭于故御史中丞張許二公  
之靈中丞體質貞正才掩賢豪詩書自負剡縣

徒勞惆悵雄筆辛勤寶刀時平位下世亂節高  
賊臣通逆國步驚搔兩河震恐千里嗷嗷投袂  
洒泣據鞍鬱陶全譙入宋收梓捍曹心繫魏闕  
志清武牢帝曰嗟爾龍光豹韜憲臺戎幕持斧  
擁旄嗚呼予亦忝竊統茲介冑俄奉短書至夔  
狂寇裹糧訓卒達曙通晝軍乃促程書亦封奏  
遂發驕勇俾驅鳥獸將無還心兵亦死鬪賊黨  
頻感我師旋漏十城相望百里不救胡羯嘯聚  
犬羊蟻湊積薪爲梁決岸成竇嗚呼當此虎敵  
豈無強隣常時肝膽今日胡秦堅守半歲絕糧

數旬柿椽秣馬煮紙均人病不暇殛歿無全身  
煎熬甲冑啄啣膠筋慷慨艱險淒涼苦辛嗚呼  
我辭淮楚將赴伊洛途出茲邦悲纏舊郭邑里  
灰燼城池墟落何九拒之崢嶸皆二賢之制作  
聲蓋天壤氣橫遼廓讓死爭先臨危靡却嗚呼  
天亦難論萬夫開壁一旅纔存衰羸旣竭  
力弱相吞陷穽織路梯衝棧門土濠水合木柵  
雲屯居即其弊突無其奔煙  
劔戟逼側紛昏  
與求生而害義寧抗節以理魂嗚呼悖逆殲潰  
干戈將止海岳澄清朝廷至理封功列爵懷黃

拖紫傷哉二賢不預於此嗚呼孀婦伶俜愛子  
追贈方榮賞延茲始寂寂梁苑悠悠睢水黃蒿  
連接白骨填委思壯志於冥冥問遺形於荆杞  
列祭空城一悲永矣

高常侍集卷第十終